

## DJOTKUN DHÄWU

# Dhuwal nhe dhu ɳurruŋuny nhäma

Ga dhuwandja bäy nhanukuŋ djourra' Djotkuŋ, ɳunhi ɳayi wäwa'mirriju Djayimgu, bili ɳayi ga dhuwal lakaranhamirr. Ga dhiyal dhäwu'ɳur ɳayi ga dämbu-biŋga'maram djätjnhä (Garrawalaŋumirriny yolŋuny walalany). Ga lakaramany ɳayi ga dhuwali ɳunhi nyäl'nydja marŋgikunhamirr mala mirithirra dhuwurr-yätjmirra, ga ɳayiny dhu walalany God-Waŋarryuny yanan dhägir'yurra.

Ga Garrawalaŋumirrnydja yolŋu walal dhu ga ɳunhi yakan walalaŋ romgu malthun nhä mak walal dhu ga yäkarrman walalany. Walalnydja yanbi dhu ga ɳunhi malthundja dhukarrwuny God-Waŋarrwalaŋuwunha yan. Ga dhawar'maramany ɳayi ga dhuwal djourra'nhany latjuy'nhä dhika bukumirriyanhawuyyu ɳayaŋu-djulŋithinyamirriynha.

<sup>1</sup> Dhuwandja djourra' ɳarrakuŋ Djotkuŋ,\* ga djämamirrnydja ɳarra dhuwal nhanŋuwuynha yan Djesu-Christkun, ga yukuyuku'mirrijuŋ ɳarra dhuwal Djayimgu.\* Ga wukirriny ɳarra ga dhuwal nhumalaŋ ɳurikiwurruŋ ɳunhi ɳayi God-Waŋarr wäthurr nhumalaŋ yäku-lakaraŋal

---

\* 1:1 Jude   \* 1:1 James

nhanjuwuylilyaŋal ɳayi, ga marrkapthunna ɳayi ga nhumalanŋgal, bala ɳayi ɳuli ga ɳunhi Djesu-Christthuny gungaman nhumalanhany.

<sup>2</sup> Ga dhuwal ɳarra ga bukumirriyaman nhumalanŋ God-Wanjarrwala, märr ɳayi dhu nhumalany dhaŋanŋguman nhanukiyingala ɳayi ɳuriŋin ɳunhi maŋutji-wuyunamirriyinha ga mägayaynha ga märr-ɳamatinyamirriyinha romdhuny.

*Marŋgi-wurrupanamirr mala nyäl-dilkurr*

*False teachers*

*Djot 3-16*

<sup>3</sup> Marrkapmirr walal ɻundu walal ɳarraku, ɳarrapiny gan ɳunhi djälthin ɳarra balanŋ nhumalanŋ ɳunhi dhäwuny muka wukirri nhawipuy, ɳunhi nhaltjan ɳayi ɳuli ga God-Wanjarryu limurruny walŋakum dhiyanŋ bala nhakun walŋay. Yurr yuwalktja ɳarra dhu dhuwal dhäwuny nhumalanŋ wukirriny dhiyanŋun bala, märr nhumany dhu ɳunhi gurrkurrdälthirra nhumalanŋuwuy nhuma märr-nhirrpanminyawuywuny ɳunhi ɳayi God-Wanjarryu dhayuŋar bukmakku nhanukalanŋumirriw yolŋuw walalanŋ ɳunhi bili yan wanŋanymirr buku-wanŋany wiynnŋumirriwnha. <sup>4</sup> Bilin barpuru dhuwal dharrwan mirithirra rom-dharajanamiriwngya yolŋu walal gayulnha gulŋiyirr malalilnydja limurrunŋgal, ga bitjanna walal ɳuli ga ɳunhi wanŋany, “Manymak limurr dhu ga ɳunhi marrambany' djäma ga ɳula nhäny mala yätjkurrnydja rom, bili ɳayiny

ŋunha God-Wanjarrnydja mel-wuyunamirr”, bitjanna. Bala nhakun walal ŋuli ga ŋunhi ŋapay-ŋurrkaman Djesu-Christnhany, ŋunhi ŋayi muka limurruŋ waŋgany yan dhuwal Buŋgawany ga Garraynydja. Baman' ŋäthil ŋula yolthu dhäruk wukirri Dhuyunjur Djorra'nur gan lakaraŋal dhuwaliwurrunhan ŋunhi yolŋuny walalany nyälmirrinhan, ŋunhi ŋayi dhu God-Wanjarryuny dhä-gir'yurrnydja walalany mirithin yan.

<sup>5</sup> Yo marŋgi muka nhuma dhuwal ŋurikiny ŋunhi ŋurruŋuwnydja dhäwuw, yurr buluyi ŋarra dhu dhuwal lakaram nhumalaŋgal liyamirriyam nhumalany, ŋunhi nhaltjarr ŋayi God-Wanjarryu dhawaŋmaraŋal yolŋuny walalany beŋur ŋunhi Yetjipŋur\* makarrŋur wäŋaŋur. Manymak wiripuwurruuwydja gan ŋunhi yolŋuy walal bøyŋun yan märr-nhirrpanminyawuy ŋayathaŋal, ga beŋuryiny dhurrwaraŋur ŋayi walalany ŋunhi God-Wanjarryuny buwayakkunaŋala yan. <sup>6</sup> Nhumany guyarin ŋunhan ŋunhi God-Wanjarrwun dhäwugänhamirrinhan yolŋuny walalany, walalnydja gan ŋunhi ganarrthaŋala walalaŋguwuuwydja wäŋa mala ga djäma mala. Bala yan ŋayiny ŋunhi God-Wanjarryuny walalany ɖapmaraŋala. Ga dhiyaŋuny bala walal ga ŋunha nhinany ŋunhan ŋunhi wäŋaŋurnydyga buku-munha'ŋura ŋarnŋaŋura biliŋuwuynha garrwi'-garrwiyunawuynha dälnha dhika djimuku'mirra, nhinan walal ga galkunna ŋurikiyin ŋunhi yindiwnha waluw mala-

---

\* <sup>1:5</sup> Egypt

djarr'yunamirriwnha. <sup>7</sup> Ga bitjarryi bili ɳayi ɳunhi God-Waŋarryu baɖuwaɖuyurr ɳunhiwurrunhany yolŋuy walalany ɳunhi walal gan nhinan ɳunhal wäŋaŋur yäkuŋur Djudum\* ga Gumura\* ga wiripuŋur mala wäŋaŋur ɳunhi marrtjin galkiwatj dhärra'-dharran. ɳunhiliyiny gan ɳunhi yolŋuy walal djäma yätjkurra yan mirithirra burrpun' rom nyalmirin, yakan walal gan ɳunhi nhakun dhunupany märranhamin djirridlkurra walal ɳunhi balanyan. Bala ɳayiny gan God-Waŋarryuny walalany nhäŋal-a-a, bala yan ɳayi milkuŋala nhanŋuwuy ɳayi ɳaramurrnydja, ɳunhi ɳayi walalany gurthaynha dhä-gir'yurrrnydja buwayakkuŋala dhawar'yunamiriwyun. Ga biyakiyin balaŋ ɳayi ɳunhi limurrunhany bukmaknhany.

<sup>8</sup> Ga bitjandhin walalnydja ɳuli ga ɳunhi dhiyaŋurruyyiny yolŋuy walal, bitjan yan bili dharaŋana yan nhakun walal gan wiripuwurruy yolŋuy walal be ɳäthil nhäŋal maŋutji-djurthinyawurr, yurr yuwalktja walal ɳuli ga ɳunhi warku'yunmirra rumbalnha walalaŋguwuy walal. Ga bulu walal ɳuli ga ɳunhi bukuy-ɳurrkam ɳunhiwurruny yolŋuny walalany ɳunhi ɳayi gan God-Waŋarryu waŋanhirrpar walalaŋ. Ga wiripuny walal ɳuli ga ɳunhi warku'yun dhä-yarrkthun waŋa ɳunhan djiwarr'puywun yolŋuw walalaŋ.  
<sup>9</sup> Ga guyanja nhuma dhu ɳunhi dhäwu ɳunhi ɳayi Mawtjitjtja\* dhiŋgaŋal, bala mandany

---

\* 1:7 Sodom   \* 1:7 Gomorrah   \* 1:9 Moses

gan ɳunhi Mäykułnydja\* ɳunhi ɳayi God-Waŋarrwu ɳurruṇu djämamirr, ga ɳunhi buŋgawany Mokuy ɳaŋ'ɳaŋ'thunminan gan rumbalŋurnydyja nhanukal Mawtjitjkalnydja. Yurr ɳayiny ɳunhi Mäykułnydja yaka warray dhä-wapthunna waŋanha nyamir'yumna ɳanya ɳunhiyiny Mokuynhany, yanan ɳayi ɳunhi waŋanany nhanŋu bitjarra, "God-Waŋarryun yan ɳayipin nhunanhany dhu dhä-gir'yun", bitjarra yan ɳayi ɳunhi nhanŋu waŋanany ga bilin.

<sup>10</sup> Ga dhuwalawurryiny yolŋuy walal ɳunhi dhä-warranydjal'nhä mala, ɳunhi walal yakan yuwalk marŋgi ɳula nhaku malaŋuw. Ga nhinany walal ɳuli ga ɳunhi ɳuriŋiyin bili yan dhäkay-ɳänhawuyun walalaŋgiyingal. Ga balanyan walalnydja ɳunhi nhakun wakinŋumirra warrakan' mala, wanaŋa-dilkurra ga guyaŋanhämiriwnha mala, ɳunhiny walal ɳuli ga nhakun rumbalnha yan baduwađuyunmirr walalaŋguwuy walal.

<sup>11</sup> Ga yindiŋura walal ɳunhi mariŋurnydyja. Malthurrnydja walal gan ɳunhi romguny nhanŋun Gayingun,\* bili djämäny walal ɳuli ga ɳunhi rrupiyawnha yan gämurruwny'tja, bitjarr nhakun ɳayi gan Baylamdhü\* djäma. Ga wiripuny walal gan ɳunhi diltji-bilyurra nhanŋuny God-Waŋarrwuny bitjarr yan bili nhakun ɳäthil ɳayi dirramu yäku Gora\* ɳunhi ɳayi gan yaka dhärük-märraŋal ɳanya God-Waŋarrnha. Ga balanyaŋuryin gämurru'ŋur

---

\* **1:9** Michael   \* **1:11** Cain   \* **1:11** Balaam   \* **1:11** Korah

ŋayiny dhu ŋunhi God-Waŋarryuny dhägir'yurrnydja ŋunhiwurrunhany yolŋuny walalany.

<sup>12</sup> Yo guyananhawuynydja mala walalanŋunhi yätj kurra yan mirithirra barrpan', ga goramiriwnha mala walal ŋunhi ga wanaŋa-dilkurra mala, ga ŋuriŋiyin romdhu walal ŋuli ga ŋunhi bađuwaduyundja nhumalany ŋathalilnydja lukanhalil, ŋunhi nhuma ŋuli luj'maranhamirrnydja buku-manapanmirrnydja ŋathawnydja lukanharaw. Balanyan walalnydja ŋunhi nhakun waŋupini ŋuli marrtji wakwakthun watawuŋ boy'yunawuy yurr dhulmu waltjaŋmiriwnha. Wiripuny walal ŋunhi balanyan nhakun dharpan marramiriwnha gurrkurrnydja marrtji warraŋulnha ŋorra'-ŋurra rakunynha, ga bäyŋun ŋuli ŋunhi borumdj ŋula ŋuthul ŋunhiliyiny dharpaŋur. <sup>13</sup> Ga balanyayin ŋunhi gora-gurrupanamirra romdja walal ŋuli ga milkumany, nhakun gapu dowu ŋuli mulmulmirriyirr, ga yaka wiyindja bala ŋuli yan winya'yunna. Ga wiripuny walal ŋunhi yolŋu walal balanya nhakun ganyu mala, ŋunhi ŋuli ga wirwiryun wäŋaw larrum, ga ŋurikiyiny ŋayi God-Waŋarryu wäŋa gänaŋ'maraŋal ben bala buku-munha'ŋura, ŋunhi dhu ga dhärra wiyinŋumirriwnha.

<sup>14</sup> Yo baman' gan yolŋu nhinan yäku Yenuk,\* yurr ŋayi ŋunhi Yadamguny\* marratja'mirriŋu, yurr ŋunha bala märr barrku. Ga ŋayin gan

---

\* **1:14** Enoch   \* **1:14** Adam

ŋunhi dhuwaliwurrunhany yolŋuny walalany lakaraŋal bitjarrnydja gam', "Nhäŋun walal, dhuwanna ŋayi Garraŋyndja marrtjin ga rrambahŋin walalnha dharrpalmirra yolŋuny walal djiwarr'puynha, yurr dharrwan dhuwal mirithirra, <sup>15</sup> marrtjiny walal ga dhuwal, walal dhu limurruny mala-djarr'yunna. Ga dhä-gir'yundja walal dhu ŋunhi yuwalk yan ŋunhiwurrunhany yolŋuny walalany ŋunhi walal ŋuli ga ŋuyulkthirr nhanŋu God-Wanjarrwu ga dhärukku nhanukalaŋaw walal ŋuli ga waŋa yätjkurruyam!"

<sup>16</sup> Yo dhuwalawurryiny ŋunhi nyälmirrnydja yolŋu walal, djäl walal, walal dhu ga nhinany galŋa-nyarrkthunna yan, gupa-waŋan ga, ga djäl-ganaŋumirra mala, ga manjutji-gäma walal dhu ga wiripuwurrunhan yan yolŋunhany walalany, ga wiripuny walal ŋuli ga ŋunhi märr-wanaŋgunhamirra, bala ga mayali'-gäman, bađuwaduyunna ga yan ŋulthu'maraman yätjkurrulila romlil, märr walal dhu märram ŋunhi nhaku walal djäl.

*Bulu raypirri mala djägakum ga*

*More warnings*

*Djot 17-23*

<sup>17</sup> Yo. Marrkapmirr lundai walal, guyanji yan walal gi ŋunhiny mala dhäwu ŋunhi walal gan Garraŋwal Djesu-Christkal djuy'yunawuyyu mala nhumalaŋ lakaraŋal. <sup>18</sup> Ga lakaraŋalnydja walal marrtjin ŋunhi nhumalaŋ bitjarr; ŋunhi dhu waluny marrtji galkithi dhädhawar'yunamirrnydja, bala dhu ŋunhi

wiripuwurrnydja yolŋu walal, ɳunhi walal ɳuli ga malthun walalaŋgiyingalaŋaw djälwu, ga wiripuny ɳunhi walal ɳuli ga ɳuyulkthirr God-Waŋarrwu, walalnydja boŋguŋ ɳunhi ɳunhiwurriyiny marrtjin bala gi warku'yurra nhumalanhany. <sup>19</sup> Ga dhiyanuny bala walal ga dhuwaliyi bitjandhin djämany gulk-gulkmaraman dhu marrtji yolŋu'-yulŋunhany, gänaŋ'maraman dhu marrtji walalaŋguwuynha walal malthunarawnydja. Bili walalany ga ɳunhi waŋa-gamany ɳuriŋin bili djälyun walalaŋgiyingal, ga bäyŋun gi ɳunhi God-Waŋarrwuny Birrimbirr nhininy walalaŋgal.

<sup>20</sup> Yo marrkapmirr walal biyak bili yan walal marrtji dhulyurrnydja bala dhuwaliyiny ɳunhi märr-nhirrpanminyawuynydja nhumalanŋuwuy nhuma dharrpalnhany, bala bukumirriyaŋuny marrtji Dhuyu-Birrimbirrwalaŋjuwurra yan gunga'yunawurrnydja. <sup>21</sup> Ga biyak bili walal gi marrtjiny rrambanjin yan ɳuriŋin ɳunhi nhanukala God-Waŋarrwala märr-ŋamathinyaraynydja, ga bitjandhiyin nhakun nhuma dhu ga ɳunhi galkundja nhanŋuny Garrawuny Djesu-Christkuny ɳayi boŋguŋ milkuŋun nhanŋuwuynydja ɳayi maŋutji-wuyunawuy, bala ɳayi dhu gurrupula nhuŋu ɳunhi walŋa-wiyinŋumirrnydja. <sup>22</sup> Gunga'yurra marrtji bala mel-wuyurra manapul ɳurikiny yolŋuw ɳunhi ɳayi ɳuli ga baŋdak yan märr-dhumbal'yun. <sup>23</sup> Ga walŋakuŋun ɳunhiny yolŋuny ɳunhi ɳayi ga djälthirr walŋathinyaraw, biyak bili yan nhakun

nhe dhu ɳula yolnha yolŋuny walŋakum gurthaŋjur nhäranhaŋjur. Yakan nhe dhu ɳunhi nhakun nhäma ɳanya ganarrthamany, ɳunhiny nhe dhu dhunupan yan waŋdirra guŋga'yunarawnha nhanŋu ɳurikiyiny yolŋuw. Ga milkunjun ɳunhi ɳayaŋu-wuyunamirrnydja romdja barrarikurra dhaŋkarrwurrnydja bala yan guŋga'yurra ɳanya. Yurr melnyaŋ'thurrnydja nhanukalaŋjaw girriw'nhä ɳunhi ɳayi moy'mirriyin dhuwurr-yätjthu romdhu.

*Dhurrwara-daw'yunna ga bukumirriyan-hawuy ga märr-yiŋgathinyawuy*

*Final prayer and praise*

*Djot 24-25*

24-25 Ga gurrupula nhanŋuny God-Waŋarrwuny wokthunamirrnydja, ga märr-yiŋgathinyamirrnydja rom limurrungalaŋjaw walŋakunhamirriwnydja, nhanukalaŋjuwurra Djesu-Christkalaŋjuwurra ɳunhi ɳayi limurruŋ Garay. Bili ɳayipin ɳuli marrtji ɳunhi God-Waŋarryun galumany nhumalany galkirrinyaŋjurnyndja, ga djämany ɳayi ɳuli marrtji nhuna ɳunhi dharrpalkuman, ga galŋa-djulŋithinyamaraman balan ɳunhi nhanukiyingala ɳayi djenarra'mirrilila dhunukulilnydja. Ga bukmak ɳunhi wokthunawuynydja rom djenarrany' ga märr-ŋal'yunawuynydja, ga ganydjarrnydja, bili nhepin yan ɳunhi ɳuyulkŋuny bukmakkuny ɳunha bala ɳurruŋaŋgal, ga dhiyaŋ bala, ga biyakun bili yan dhu wiyanŋumirra. Yo, yo.

## **God-Wanjarrwu Walŋamirr Dhäruk The New Testament in the Djambarrpuyngu language of Australia**

copyright © 2008 Bible Society of Australia

Language: Djambarrpuyngu (Djambarrpuyngu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-07-08

---

PDF generated using Haiola and XeLaTeX on 11 Nov 2022 from source files dated 29 Jun 2022

74cf6b30-50a6-5ed9-9a5d-b3fd5daeeecab